



REPUBLIKA E SHQIPËRISË
KOMISIONI QENDROR I ZGJEDHJEVE

KOMISIONI I ANKIMIMEVE DHE
SANKSIONEVE

Data: 24 Mars 2021

Nr: 11

VENDIMI

“PËR SHQYRTIMIN E KËRKESËS ANKIMORE NR. 06 DATË 20.03.2021, TË
KOALICIONIT ALEANCA (AL) ME OBJEKT “KUNDËRSHTIMIN E VENDIMIT NR. 165,
DATË 18.03.2021 TË KOMISIONERIT SHTETËROR TË ZGJEDHJEVE”

Komisioni i Ankimimeve dhe Sanksioneve në mbledhjen e datës 24.03.2021, me pjesëmarrjen e:

Elvis ÇEFA	-	Kryesues
Elvin LAKO	-	Anëtar
Illirjan RUSMALI	-	Anëtar
Koli BELE	-	Anëtar
Ledio BRAHO	-	Anëtar

Në prani të administratës së Komisionit Qendror të Zgjedhjeve, përfaqësuar nga Sekretari i Përgjithshëm,

Shqyrtoi çështjen me:

Ankues : Koalicioni “ALEANCA” AL përfaqësuar nga z. Eduard Abazi;

OBJEKTI: Shqyrtimin e kërkesës ankimore nr. 06, datë 20.03.2021 të koalicionit Aleanca AL me objekt “Kundërshtimin e vendimit nr. 165, datë 18.03.2021 të Komisionerit Shtetëror të Zgjedhjeve “Për shqyrtimin e kërkesës për miratimin e listave shumemërore të koalicionit Aleanca (AL), për zgjedhjet për Kuvendin të datës 25 prill 2021”.

BAZË LIGJORE: Bazuar në nenet 67, 72 dhe 73 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar; si dhe shkronja “c” e pikës 1 të nenit 30 të vendimit nr. 3, datë 06.11.2020 të Komisionit Rregullator, “Për miratimin e rregullores “Për mënyrën e funksionimit dhe zhvillimit të seancave të Komisionit të Ankimimeve dhe Sanksioneve”, në emër të Komisionit Qendror të Zgjedhjeve.



Rrethanat e çështjes:

Me vendimin nr. 108, datë 02.03.2021, të Komisionerit Shtetëror të Zgjedhjeve, koalicioni Aleanca (AL) është regjistruar si subjekt zgjedhor, për zgjedhjet për Kuvendin të datës 25 Prill 2021 me parti pjesëtare të tij si më poshtë:

1. Partia Aleanca Demokratike Shqiptare;
2. Partia Aleanca për Demokraci dhe Solidaritet;
3. Partia e Reformave Demokratike e Shqipërisë;
4. Partia Aleanca për Barazi dhe Drejtësi Europiane;
5. Partia Lëvizja Punëtore Shqiptare;
6. Partia për Mbrojtjen e të Drejtave të Emigrantëve;
7. Partia Qytetare Shqiptare.

Më datë 08.03.2021, Koalicioni Aleanca (AL) ka paraqitur në Komisionin Qendror të Zgjedhjeve dokumentacionin për miratimin e listave shumëmemërore.

Me vendimin nr. 138, datë 11.03.2021, Komisioneri Shtetëror i Zgjedhjeve ka vendosur kthimin për korrigjim të dokumentacionit, të listës shumëmemërore të kandidatëve për deputet të subjektit zgjedhor, koalicioni Aleanca (AL).

Brenda afatit ligjor, subjekti zgjedhor koalicioni Aleanca (AL) ka depozituar dokumentacionin e korrigjuar.

Në përfundim të procesit të verifikimit nga ana e Komisionerit, janë rikonstatuar mangësi dhe mospërbushje të dokumentacionit si më poshtë:

- Koalicioni Aleanca (AL) nuk ka paraqitur dokument provues për plotësimin e kërkesave të nenit 68 të Kodit Zgjedhor. Koalicioni ka paraqitur vërtetimin për zotërimin e 2 (dy) mandateve në Kuvend. Partitë pjesëtare të koalicionit Aleanca nuk vërtetojnë se zotërojnë bashkërisht në Kuvend numër mandatesh jo më të vogël se numri i partive pjesëtare të koalicionit. (Janë regjistruar 7 parti pjesëtare të koalicionit, pra duhet paraqitur vërtetim për zotërimin e të paktën 7 mandateve në Kuvend)
- Gjithashtu nuk janë paraqitur listat mbështetëse me jo më pak se 7000 (shtatë mijë) zgjedhësve në shkallë kombëtare.
- Kërkesa për miratimin e listës shumëmemërore të kandidatëve për deputet për zonën zgjedhore Qarku Korçë, kandidati me numër rendor 3 dhe Qarku Tiranë, kandidati me numër rendor 31, z. Klajdi Bufi, nuk është në përputhje me pikën 3 të nenit 67 të Kodit Zgjedhor pasi nuk plotëson kriterin për t'u regjistruar si kandidat i listës shumëmemërore vetëm në një zonë zgjedhore.

- Deklaratat e kandidatëve të listave shumëmemërore, të cilët deklarojnë se gëzojnë të drejtën e votës dhe se pranojnë të kandidojnë si kandidatë të listës shumëmemërore të koalicionit Aleanca (AL), Model – 05, rezultojnë të plotësuarra gabim për të gjitha zonat zgjedhore.
- Kandidati Genci Sulce Sakaj në listën e Vlorës është brenda periudhës së ndalimit për zgjedhjen në funksion kandidat për deputet në Kuvendin e Shqipërisë për arsye se është ende brenda afatit 10 vjeçar të parashikuar nga ligji 138/2015 “Për garantimin e integritetit ...”
- Gjithashtu janë vënë re parregullsi në dokumentacionin e kandidimit të kandidatëve për deputetë në disa qarqe. (Tiranë – nr. 07; Durrës – nr. 01 dhe nr. 15; Elbasan – nr. 13, nr. 14 dhe nr. 15; Shkodër – nr. 9 dhe nr. 11; Fier – nr. 01, nr. 06 dhe nr. 16; Kukës – nr. 02; Vlorë – nr. 01; Gjirokastër nr. 02, nr. 04 dhe nr. 06; Lezhë – nr. 01.)

Për arsyet e lartpërmendura, Komisioneri Shtetëror i Zgjedhjeve, me vendimin nr. 165, datë 18.03.2021 ka vendosur: Refuzimin e listave shumëmemërore të koalicionit Aleanca (AL) për zgjedhjet për Kuvendin e Shqipërisë të datës 25 Prill 2021.

Në datën 20.03.2021 Koalicioni “Aleanca” (AL) ka paraqitur ankimin pranë Komisionit Qendror të Zgjedhjeve me objekt kundërshtimin e vendimit nr. 165, datë 18.03.2021 të KSHZ-së, duke argumentuar se:

- Për sa i përket nenit 68, pika 3 të Kodit Zgjedhor që thekson: “Për qëllim të këtij neni, partia politike ose koalicioni paraqet një vërtetim me shkrim, të nënshkruar nga institucioni i Kuvendit apo njësia e qeverisjes vendore, ku vërtetohet zotërimi i mandatit të paktën 6 muaj para përfundimit të mandatit të Kuvendit ose të organit të njësisë së qeverisjes vendore, në bazë të vetëdeklarimit të zotëruesve të mandateve për përkatësinë në partinë politike, në institucionin përkatës.”. në këtë kontekst, meqenëse pesë subjekte pjesë e këtij koalicioni, nuk paraqitën kandidatët e tyre në listat e depozituara në KQZ, kjo nënkupton se këto parti u tërhoqën nga gara dhe mbetën vetëm dy subjekte, me dy mandate mbështetëse:

1. Partia Aleanca Demokratike Shqiptare (AD)
2. Partia e Reformave Demokratike e Shqipërisë (PRDSH)

Në mbështetje të këtij argumenti, pala ankuese ka paraqitur në datën 23.03.2021 dokumentacion plotësues ku ndër të tjerat ka depozituar një Deklaratë e datës 12.03.2021 e cila pasqyron faktin se: Partia Aleanca për Demokraci dhe Solidaritet; Partia Aleanca për Barazi dhe Drejtësi Europiane; Partia Lëvizja Punëtore Shqiptare; Partia për Mbrojtjen e të Drejtave të Emigrantëve; Partia Qytetare Shqiptare janë tërhequr nga koalicioni Aleanca (AL) si edhe një deklaratë tjetër e po të njëjtës datë me ane të së cilës, dy partitë e ngelura shfaqin vullnetin të vijojnë garën në koalicion.

- Listat shumemërore me kandidatë për deputetë, dorëzuar pranë KQZ-së, kanë shprehur qartë respektimin e detyrimit ligjor, ku secili subjekt garues në koalicion duhet të mbështetet nga një mandat.
- Pasi rishqyrtuam duke ballafaquar vërejtjet për korrigjim sipas vendimit nr. 138, dt. 18.03.2021 me vërejtjet e paraqitura në vendimin nr. 165, dt.18.03.2021, me ndonjë përjashtim nuk rezultojnë të qenësishme:
 1. Në vendimin objekt ankimi janë konstatuar mangësi në dokumentet e kandidatëve pjesë e listës së parë, për të cilët nuk ka patur vërejtje sipas vendimit nr. 138, dt. 11.03.2021 të Komisionerit.
 2. Nga Komisioneri janë konstatuar me mangësi në dokumentacion disa kandidatëve, të cilët janë zhvendosur në lista nga qarku në qark, edhe pse dokumentat e këtyre kandidatëve kanë qenë të depozituara dhe vlerësuara si të rregullta në qarqet ku ishin propozuar në listat e dorëzuara në datën 08.03.2021.
- Në lidhje me plotësimin gabim të formularit Model-05 ai dukshëm dallon që është një gabim shtypi, pasi janë çekuar dy kuadrate por nga plotësuesi është plotësuar vetëm njëri kuadrat dhe tjetri është lënë bosh duke humbur vlefshmërinë e kuadratit të çekuar gabim, gjë që dukshëm vërehet se është gabim në shtyp.

Referuar sa më sipër, ankuesi kërkon rrëzimin e vendimit nr. 165, datë 18.03.2021 marrë nga Komisioneri Shtetëror i Zgjedhjeve si vendim i padrejtë.

Ankimi iu paraqit KAS-it, i cili caktoi relator z. Elvis Çefa. Në seancën e datës 23.3.2021, KAS-i me vendim të ndërmjetëm vendosi pranimin për shqyrtim të kërkesës ankimore dhe caktoi seancën e shqyrtimit në datën 24.3.2021, ora 13:30 duke vendosur thirrjen në seancë të përfaqësuesit të ankuesit dhe të përfaqësuesve nga administrata e KQZ-së.

Në seancën publike për shqyrtimin në themel të çështjes e zhvilluar në datë 24.3.2021, e cila u zhvillua në prani të përfaqësuesit të koalicionit ALEANCA dhe të përfaqësuesve të administratës së KQZ-së, KAS-i mori në shqyrtim dhe administroi:

- o Kërkesën Ankimore nr. 06, datë 20.3.2021 të koalicionit Aleanca (AL);
- o Plotësimin e ankimit të depozituar në datën 23.03.2021;
- o Deklaratë e datës 12.3.2021;
- o Vendimin e Komisionerit Shtetëror të zgjedhjeve nr. 165, dt. 18.03.2021;
- o Vendimin e Komisionerit Shtetëror të zgjedhjeve nr. 138, dt. 18.03.2021;

- o Vendimin e Komisionerit Shtetëror të zgjedhjeve nr.108, datë 02.3.2021 “Për shqyrtimin e kërkesës për regjistrimin e koalicionit ALEANCA (AL) për zgjedhjet për Kuvendin të datës 25 prill 2021”;
- o Procesverbal i zbardhur i seancës publike të Komisionerit Shtetëror të Zgjedhjeve datë 18.3.2021 ora 11.51 “Për shqyrtimin e kërkesës për regjistrimin e listave shumemërore të Koalicionit ALEANCA për zgjedhjet për Kuvendin të datës 25 prill 2021”.

Në përfundim të shqyrtimit administrativ dhe të vlerësimit të provave dhe pretendimeve të palëve,

Komisioni i Ankimimeve dhe Sanksioneve konstaton se:

Pas vlerësimit të pretendimeve të ngritura nga ankuesi, të dokumentacionit në tërësi dhe të listave shumemërore të koalicionit Aleanca (AL), për zgjedhjet për Kuvendin të datës 25 Prill 2021, KAS konstatoi se dokumentacioni i paraqitur nuk është në përputhje me kriteret e përcaktuara në nenet 67, 72 dhe 73 të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar dhe si e tillë, ankimi nuk mund të pranohet:

1. Në kuptim të nenit 65 të Kodit Zgjedhor *“Dy ose më shumë parti politike të regjistruara si subjekte zgjedhore në KQZ, sipas nenit 64 të këtij Kodi, mund të regjistrohen në KQZ si koalicion zgjedhor në shkallë vendi jo më vonë se 60 ditë përpara datës së zgjedhjeve.”*. Pikërisht në ushtrim të kësaj të drejte koalicioni ALEANCA, i përbërë nga 7 parti politike ka paraqitur kërkesën për t’u regjistruar në zgjedhjet për Kuvend të datës 25 prill 2021. Në zbatim të urdhërimeve të nenit 65 të Kodit Zgjedhor që parashikon se *“Marrëdhëniet midis partive pjesëtare të koalicionit dhe detyrimet reciproke midis tyre rregullohen në marrëveshjen e koalicionit, e cila është pjesë e dokumentacionit që depozitohet nga koalicioni në KQZ.”*, koalicioni në fjalë ka depozituar gjithashtu në KQZ marrëveshjen përkatëse. Sikurse është pranuar edhe nga përfaqësuesi i subjekti ankimues në ankimin e tij por edhe në deklaratimet në seancë, në momentin e paraqitjes në KQZ të kërkesës për regjistrimin e listave të kandidatëve për Kuvendin (në datën 08.3.2021), Koalicioni Aleanca (AL) nuk ka paraqitur dokument provues për plotësimin e kërkesave të nenit 68 të Kodit Zgjedhor. Konkretisht koalicioni ka paraqitur vërtetimin për zotërimin e vetëm 2 (dy) mandateve në Kuvend, ndërkohë që sipas dispozitës përkatëse, që koalicioni të regjistrohej si i tillë duhet të zotëronte të paktën 7 (shtatë) mandate. Në alternativë, koalicioni duhej të kishte paraqitur listat mbështetëse me jo më pak se 7000 (shtatë mijë) zgjedhës në shkallë kombëtare. Ky rregull i materializuar në pikën 1 të nenit 68 është një kusht thelbësor i detyrueshëm për t’u respektuar nga koalicioni dhe mosrespektimi i tij passjell refuzimin e regjistrimit të listave shumemërore.



2. Me ridorëzimin e listës shumemërore të kandidatëve për deputetë, pas kthimit për plotësim nga Komisioneri, duke qenë se sipas formimit të koalicionit me 7 parti politike, asnjë nga këto kushte të kërkuara nga ligji (7 mandate deputetësh apo listë mbështetëse me 7000 zgjedhës) nuk mund të plotësohej, 5 nga 7 partitë politike përbërëse të koalicionit ALEANCA kanë deklaruar me deklaratën e datës 12.3.2021 tërheqjen e tyre nga koalicioni Aleanca (AL) duke mbetur në koalicion tashmë vetëm 2 parti politike të cilat po sipas Deklaratës, shfaqin vullnetin të vijojnë garën, dhe konkretisht:

- Partia Aleanca Demokratike Shqipëtare (AD),
- Partia e Reformave Demokratike e Shqipërisë (PRDSH)

Duhet evidentuar fakti se Deklarata e mësipërme nuk është paraqitur si provë gjatë seancës “Për shqyrtimin e kërkesës për regjistrimin e listave shumemërore...” të mbajtur nga Komisioneri në datën 18.3.2021. Madje në referim të procesverbalit të kësaj seance, i cili u administrua si provë nga KAS, nuk rezulton që përfaqësuesi i koalicionit ALEANCA të ketë ngritur pretendimin e ekzistencës së kësaj Deklarate edhe pse ajo mban datë 12.3.2021, pra përpara zhvillimit të kësaj seance publike.

Madje referuar përsëri procesverbalit të seancës “Për shqyrtimin e kërkesës për regjistrimin e listave shumemërore...”, rezulton se përfaqësuesi i koalicionit z. D. Mullahaj, ka paraqitur argumente kontradiktore përpara Komisionerit, herë duke pretenduar se partitë politike që nuk kishin mbështetje në numër mandatesh në Kuvend janë tërhequr nga listat, herë duke pretenduar se partitë nuk janë tërhequr nga koalicioni, por se koalicioni tashmë përfaqësohet vetëm nga dy sigla partish politike.

Ndryshe nga sa u deklarua në seancë, në asnjë moment, përfaqësuesi i koalicionit në KQZ nuk ka kërkuar të administrohet Deklarata e datës 12.03.2021 ku pasqyrohet fakti se 5 parti përbërëse të koalicionit janë tërhequr duke mos qenë më pjesë e tij.

3. KAS vlerëson se pretendimi i parashtruar në seancë se 5 nga 7 partitë politike përbërëse të koalicionit ALEANCA janë tërhequr nga koalicioni, dhe se tashmë koalicioni ALEANCA përbëhet vetëm nga dy parti politike të cilat duhet të vijojnë regjistrimin e listave shumemërore të kandidatëve, është një argument juridik i cili nuk gjen mbështetje në Kodin Zgjedhor. Tërheqja nga koalicioni i shumicës së partive pjesëmarrëse në të, pasi ky koalicion është regjistruar si i tillë në KQZ, në vetvete, është një veprim i cili pamundëson vijim e mëtejshëm të garës në formë koalicioni të partive të mbetura. **Në këtë rast, de facto jemi para formimit të një koalicioni të ri zgjedhor, i cili nuk është i regjistruar në kuptim të nenit 65 të Kodit Zgjedhor (madje e ka objektivisht të pamundur të regjistrohet për shkak të kalimit të afateve ligjore) dhe si i**

tillë nuk mund të paraqesë për regjistrim as lista shumemërore të kandidatëve për zgjedhjet e Kuvendit. Refuzimi i listës nga ana e Komisionerit, është pasojë direkte e mangësive të vetë subjektit zgjedhor.

4. Koalicioni konsiderohet i regjistruar në zbatim të nenit 65 të K.Zgjedhor dhe nga ai moment fiton personalitetin juridik si subjekt zgjedhor në formën e koalicionit. Pika 1 e këtij neni parashikon se *“Dy ose më shumë parti politike të regjistruara si subjekte zgjedhore në KQZ, sipas nenit 64 të këtij Kodi, mund të regjistrohen në KQZ si koalicion zgjedhor në shkallë vendi jo më vonë se 60 ditë përpara datës së zgjedhjeve”*. Për këtë arsye, është e pamundur që në tejkalim të këtij afati të fitojë personalitet një koalicion tjetër, qoftë ky dhe me uljen e numrit të partive politike në një koalicion të regjistruar. Duke qenë se Partia Aleanca Demokratike Shqiptare (AD) dhe Partia e Reformave Demokratike e Shqipërisë (PRDSH) janë regjistruar si parti politike në përputhje me nenin 64 të K.Zgjedhor, pas tërheqjes nga koalicioni të pesë partive të tjera politike, ato mund të kandidonin vetëm si parti politike në zgjedhjet e 25 prillit 2021 e për rrjedhojë, në zbatim të nenit 67 të K.Zgjedhor, duhet të depozitonin listat e kandidatëve si parti politike në vete dhe jo si koalicion.
5. KAS vlerëson gjithashtu se në referim të Kodit Zgjedhor ekzistonte mundësia që dy partitë politike të mbetura nga koalicioni ALEANCA, duke qenë se janë parti që plotësojnë kushtin e zotërimit të një mandati në Kuvend, të ushtronin të drejtën e tyre për të marrë pjesë në zgjedhjet e datës 25 prill 2021 duke konkurruar në zgjedhje si parti politike të veçanta, dhe për rrjedhojë duke paraqitur secila në vete listën shumemërore të tyre me kandidatë për zgjedhjet e Kuvendit. Kjo mundësi nuk është shfrytëzuar.
6. KAS vlerëson se Ankuesi nuk arriti të jepte një argumente bindëse në pretendimin e tij se listat shumemërore të kandidatëve për deputetë u ridepozituan në KQZ duke ballafaquar vërejtjet për korrigjim sipas vendimit nr. 138, datë 18.03.2021 dhe se të gjithë kandidatët e koalicionit tashmë kanë dalë nga dy partitë politike, duke u përshtatur kështu formalisht me formën e re të koalicionit, tashmë i përbërë nga vetëm me dy parti. Nga këqyrja dhe vlerësimi në seancë, rezultoi se në listën shumemërore të kandidatëve për deputetë të qarkut Vlorë, e ridepozituar në KQZ pas korrigjimeve të pretenduara nga ankuesi, kandidatët me numër rendor 5, 11 dhe 12 i përkasin përkatësisht partive politike ABDE dhe PQSH, parti të cilat sipas vetë pretendimeve të ankuesit nuk ishin më pjesë në koalicionin Aleanca dhe si të tilla nuk duhet të kishin kandidatë në listat shumemërore të rikorrigjuara. KAS nuk konsideron si argument të mjaftueshëm për t'u marrë në konsideratë pretendimin e palës ankimuese se edhe në këtë rast kemi të bëjmë me një gabim material në hartimin e listave.

7. KAS vlerëson se ankimesi nuk arriti të provojë se ka plotësuar saktë dokumentacionin e kandidimit të kandidatëve për deputetë në qarqet: Tiranë – kandidati nr. 07; Durrës – kandidati nr. 01 dhe nr. 15; Elbasan – kandidati nr. 13, nr. 14 dhe nr. 15; Shkodër – kandidati nr. 9 dhe nr. 11; Fier – kandidati nr. 01, nr. 06 dhe nr. 16; Kukës – kandidati nr. 02; Vlorë – kandidati nr. 01; Gjirokastër kandidati nr. 02, nr. 04 dhe nr. 06; Lezhë – kandidati nr. 01.

Më konkretisht, rezultoi se Deklaratat e kandidatëve të listave shumëmemërore, të cilët deklarojnë se gëzojnë të drejtën e votës dhe se pranojnë të kandidojnë si kandidatë të listës shumëmemërore të koalicionit Aleanca (AL), Model – 05, rezultojnë të plotësuara në mënyrë jo të saktë për të gjitha zonat zgjedhore edhe pas kthimit për plotësim të listave me vendimin nr. 138, datë 11.3.2021 dhe ridepozitimit së tyre në KQZ. Konkretisht janë konstatuar raste kur ankuesi nuk ka pasqyruar dhe reflektuar në deklaratat shoqëruese të listave të kandidatëve ndryshimet e bëra në listat shumëmemërore të kandidatëve sipas qarqeve; janë konstatuar raste të mungesave të deklaratave të kandidatëve Model 05; janë konstatuar raste kur nuk është plotësuar qarku në të cilin do të kandidojë kandidati si dhe raste kur kandidatët nuk kanë përzgjedhur me (x) përgjigjen për të deklaruar se në cilin qark pranojnë të kandidojnë, në listat shumëmemërore të Partisë/Koalicionit apo si kandidat i mbështetur nga zgjedhësit.

Pas rikonfigurimit të listës shumëmemërore të kandidatëve, këto ndryshime duhet të ishin pasqyruar edhe në dokumentacionin e kandidimit të secilit kandidat duke e përshtatur këtë dokumentacion me rikonfigurimin e listës.

8. Nuk qëndron gjithashtu pretendimi i ngritur nga ankuesi në seancë se ishte detyrë e administratës së KQZ që të orientonte saktë përfaqësuesit e Koalicionit për mënyrën e plotësimit të listave shumëmemërore apo të dokumenteve shoqëruese të kandidimit. KAS konsideron se në mbështetje të parimit të prezumimit të njohjes së ligjit, është detyrim primar i subjektit zgjedhor plotësimi paraprakisht i të gjitha kërkesave të neneve 67, 68 dhe 72 të Kodit Zgjedhor në funksion të paraqitjes për regjistrim të listave shumëmemërore të kandidatëve, ashtu sikundër Komisioneri në referim të nenit 73, ka tagrin e verifikimit, kthimit për korrigjim dhe miratimit apo refuzimit të tyre.

Për këtë arsye KAS e konsideron të drejtë vendimin e Komisionerit Shtetëror të Zgjedhjeve nr. 165, datë 18.3.2021 dhe për rrjedhojë ai duhet lënë në fuqi.

V E N D O S I:

1. Rrëzimin e Kërkesës Ankimore nr.06, datë 20.03.2021 të subjektit zgjedhor koalicioni Aleanca (AL).
2. Lënien në fuqi të vendimit nr.165. datë 18.03.2021 të Komisionerit Shtetëror të Zgjedhjeve “Për shqyrtimin e kërkesës për miratimin e listave shumëmemërore të koalicionit Aleanca (AL), për zgjedhjet për Kuvendin të datës 25 Prill 2021”.
3. Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.
4. Kundër këtij vendimi mund të bëhet ankim në Kolegjin Zgjedhor pranë Gjykatës së Apelit Administrativ, Tiranë brenda 5 ditëve nga shpallja e tij.

Elvis ÇEFA - Kryesues

Elvin LAKO - Anëtar

Ilirjan RUSMALI - Anëtar

Koli BELE - Anëtar

Ledio BRAHO - Anëtar